

Nunatta Qitornai

Inatsisartuni



29. oktober 2018

UKA2018/80

Nuna tamakkerlugu Pinaveersaartitsinermut Siunnersuisoqatigiinnik pilersitsinissaq pillugu kingusinnerpaamik UPA2019-mi siunnersuummik saqqummiusseqqullugit Naalackersuisut peqquneqarnissaanik Inatsisartut aalajangiiffigisassaattut siunnersuut. Siunnersuisoqatigiit Naalackersuisunut, Inatsisartunut taamatullu kommuninut siunnersuisartuussapput atulissallutillu najukkani pinaveersaartitsinermut ataatsimiititaliaq, Imigassaq aamma Ikiaroorartoq pillugit Siunnersuisoqatigit kiisalu immaqa Peqqinnissaqarfinni pinaveersaartitsisutut siunnersortitut atorfillit taarserlugit. Forslag

(Aleqa Hammond, Nunatta Qitornai)

Tillie Martinussen Suleqatigiissitsisuniit siunnersuuteqarpoq naalackersuisut sulissutigissagaat nuna tamakkerlugu atuuttussamik Pinaveersaartitsinermut Siunnersuisooqatigiinnik pilersitsinissaq. Ilanngullugu siunnersuutigaa taakku Siunnersuisooqatigiit pilersinneqartuussat tassaassasut pisortanut tassa naalackersuisunut, inatsisartunut kommuninullu siunnersuisuussasut. Siunnersuutigataa Imigassaq ikiaroorartoq pillugit siunnersuisooqatigiit aammalu Peqqinnissaqarfinni pinaveersaartitsinermi siunnersortitut atorfillit taarserneqassasut.

Inuiaqatigiit peqqissut pilersinneqassappata pingaaruteqarluinnarpoq ilaqutariit pitsaaliuinnermut peqqissumillu inuuneqarnissamik siunnerfeqarlutillu meerartaminnut aqqutissiuussisut. Inuunerluuteqartoqartillugu allannguiumassuseq pigineqassaaq amerlasuutigullu tamanna nammineq anguniarlugu ajornartorsiortoqartillugu siunnersorneqarneqarsinnaaneq periarfissaajuassasoq isumaqarpugut.

Ukiuni kingullerni pitsaaliuinnermik suliaqartut saqqumilaarnerat, raatiuukkut tusarsaaneri aammalu allatigut inuiaqatigiinni akuullutik pitsaaliuisut sulinerat assut nersugassaavoq qujanartoq. Pitsaaliuinnermi suliat amerliartorput, eqqummaariffigisassat assigiinngisitaarnerulerput tamarmillu inooriaattitsinnik tunngaveqarlutik.

Siunnersuuteqartoq isumaqatiginarpoq tunngavilersuuteqarmat ataqatigiissaarineq aammalu aqut-sineq pitsaanerulluinnarnerusariaqartoq ullumikkornit ingerlariaatsimit. Naalackersuisunit tamanna assortorneqanngilaq oqaatigineqarporlu naalackersuisut akissuteqaataanni maannamut suliniar-toqareersoq tassalu maannamut pitsaaliuinnermut suliaqarnermut maanna imigassaq ikiaroorartoq pillugit siunnersuisooqatigiit, Pinaveersaartitsinermi Qitiusumik Ataatsimiititaliaq, Pinerlunginnissamut Siunnersuisooqatigiit il. Il ataatsimoortumik allattoqarfimmik pilersitsinissamik eqqarsaatersuuteqartoqareersoq naalackersuisut akissuteqaamminni erseqqissaassutigaat.

Nunatta Qitornai

Inatsisartuni



Tamassuma allanngortariaqarnerani sulineq annertussanerarpaat oqaatigalugillu inatsisitigut kalluagassat amerlassasut aaqqissuussinerlu sorleq pitsaanerunersoq misissorluassallugu pisariaqartinneqartoq.

Tamanna tunngavilersuut paasilluarlutigu siunnersuuteqartup siunnersuutaa ilalinngilarput siunnersuullu taamatut isikkoqartillugu itigartillutigu.